



Fwen Gujli

勉 励 歌

□ Sinh Guj / 辛古



Mbwk:
Daegbeix gaej doeknaiq,
Va baih lij dauq maenh,
Geiq neix ndaem mbouj baenz,
Gaenlaeng youh cawx ceh.

Sai:
Duzlungz mbouj dwkrenz,
Mbwn rengx caemh ndit doengx,
Doenghgo hix mbouj noengq,
Dai geij doengh haeuxnaz.

Mbwk:
Daenggoenz ciuq baihbaek,
Fwj baenzndaek baihsae,
Naihsim dawz roengzbae,
Cungj miz baez roengz fwn.

Sai:
Geiqciet gaenq gvaqbae,
Byajraez hix fouz yungh,
Maqmuengh fwnraemx cung,
Bineix ndaej fungsou.

Mbwk:
Byajraez laeng doekfwn,
Gwnz mieng cungj dwg raemx,
Doenghgo caez dwkraemx,
Maj ndaej aemyangyang.

Sai:
Doekfwn ndikfwn iq,
Mieng lij caengz ndaej rim,
Doenghgo gwn mbouj imq,
Aeu gijmaz limz gyaj.

Mbwk:
Cingj beix gaej doeknaiq,
Baenzlai raemx youq daemz,
Aeu dwk naz lienzhaemh,
Doenghgo aem fouzbeij.

Sai:
Daenggoenz baez bin hwnj,
Haemhlwenz dwn raemx coq,
Doenghgo hawqfofo,
Gwnz namh doq dek caez.

Mbwk:
Daenggoenz bin hwnj mbwn,
Banhaemh ndwnj roengz bya,
Mbouj miz di ndit dak,
Doenghgo maj mbouj mwn.

Sai:
Daenggoenz doek roengz bya,
Mboujcaiq ma doxdauq,
Rin doek roengz haijlaux,
Baenzlawz fouz hwnjdaeu.

Mbwk:
Daenggoenz doek baihsae,
Yungh mae rag doxdauq,
Rin doek roengz haijlaux,
Aeu muengx lauz hwnjma.

Sai:
Dingq nuengx baenzneix gangj,
Ndawsim gou mbouj caem,
Ra haeuxceh ma ndaem,
Gaem seizgan youq fwngz.

(sat)

•heiqdinj•

Ngaenz Bangbouj Deng Laengzlouz Le

补 助 款 被 截 留 之 后

□ Boh Dahging / 波达荆

Seizgan: Ciuhneix
Diegdeih: Cunhveijvei
Vunz ndawheiq:

Maj cihsuh, bouxsai, 50 bi,
dangcijhbu suhgi ndaw mbanj

Cangh cujyin, bouxsai, 40 bi,
cunhveijvei cujyin ndaw mbanj

Liengz vwnzsuh, mehmbwk, 30
bi, cunhveijvei fucujyin、vwnzsuh

Gingjmuq: Banhgoengsiz cunhveijvei
Haimuq: (Maj cihsuh sim naek-
dumdum hwnjciengz.)

Maj cihsuh: (Naengh youq gwnz ejj
gyangznaek)

Aen gunghcozdui baumbanj ndaw
cin haenx vuenh le, gyoengqde cungj
mbouj haeujrwz gou boux cunhcihsuh
neix geijlai, dauqdaej vih maz ne?
Mboengqneix doenghboux gunghcoz
duiyenz doiq gou cungj mbouj caep
mbouj ndat, mbouj lumj gyoengq
gunghcoz duiyenz gaxgonq haenx
ngoenznaengz coh gou goenggoeng
gingqgingq. Neix dauqdaej vihmaz
ha? Nanzdauh gyoengqvunz neix miz
boux rox gij hangxaex dou……

(Cangh cujyin hwnjciengz.)

Cangh cujyin: Gyoengq gunghcozdui
baumbanj neix daeu le, couh lumj
vuenh lingh aen mbwn. Geij ngoenz
neix ha, gyoengqde roengz mbanj
daeu raen daengz gou nem cihsuh
cungj mbouj swt geijlai, dauqfanj bae
depgyawj dah vwnzsuh oiq lai, nanz-

dauh gyoengqde gaenq ndaej gaem-
dawz gij doenjcax dou? (Aen lingz
soujgih yiengj, fwngz saenzdwdwd
ciep denva.) Vei……

(Maj cihsuh raen Cangh cujyin
ciep denva, guhmuengz gomrwz
laeglemx dingq. Couh raen Cangh
cujyin gven’gvak soujgih.)

Cangh cujyin: Ej meh mwngz! (Uet
hanh)

Maj cihsuh: Cujyin, nyaenx caeux
byawz dwk denva daeu?

Cangh cujyin: O, Mbouj rox byawz
daj loeng, hawj gou doeksaet caez.

Maj cihsuh: Mwngz lau maz?

Cangh cujyin: A, ……mbouj lau……
gou lau maz?

(Liengz vwnzsuh dawz faenh
vwnzgen ndeu hwnjciengz.)

Liengz vwnzsuh: (Yawj vwnzgen,
nam oksing) Gij hong cienhangh
cazcawq “seiqfung” caeuq nduknaeuh
vwndiz fatseng youq henz ndang
vunzlai haenx, (Fan yawj vwnzgen)
Duzguk、duznengznayen doengzcaez
dwk…… Cihsuh, cujyin, miz vwnzgen
moq ngamq daeu daengz, cingj
goengdaez menh yawj.

(Maj cihsuh、Cangh cujyin song
fwngz saenzdwdwd doxlwnz ciep
vwnzgen.)

Liengz vwnzsuh: Cihsuh, cujyin, sou
song boux baenzlawz la?

Maj cihsuh: A, mbouj…… Mbouj



Gyoengq dahsau diuq fouxbohgm.

(Yiming ingj)

miz maz.

Cangh cujyin: Mbouj…… Mbouj miz
maz.

Liengz vwnzsuh: Cihsuh, cujyin, sou
menhmenh yawj, gou bae guh di
caizliuh gonq, baihgwnz coigitgit, coi
aeu gaenj lo.

Maj cihsuh: A, baihgwnz coi aeu
gip? (Yiep raixcaix)

Cangh cujyin: Cingqcaen coi aeu gig
gip? (Fwngz saenzdwdwd)

Liengz vwnzsuh: Dwg ha, baihgwnz
daengq guh maz hong cungj dwg
anbaiz ndaej gaenjniuniu, cungj mbouj
hawj raeuz ndaej hoengq diemheiq.
(Gangj dwk, roengzbae fwdwd)

Maj cihsuh: Dwg guh gawjbauq
caizliuh ba? Mwngz yawj, Sim vunz
nanz raen doh ha!

Cangh cujyin: Dwg ha, dah vwnzsuh

neix gaenq couh hozhaenz aen eij
raeuz nanz lo, seizneix ngamj de lo,
raeuz cungj doek roengz ngamzfwngz
de bae lo. De baez gawjbauq raeuz,
raeuz couh deng caz lo, de couh ndaej
swnhleih daeu ciemq aen diegvih
raeuz lo.

Maj cihsuh: Ngeix hwnj gou cingsim
son’gyauq de baenzlai bi, cix son-
gyauq ok duz manaez ndeu, doeklaeng
lij deng de gyangwn bae, boihseiz lai
lo.

Cangh cujyin: Caeux rox doekfwn,
hozbiet dak haeux. Danghnaeuz
gaxgonq mwngz mbouj daez de
hwnjdaeu, de bae gyawz miz
ngoenzneix? De mbouj gyo’mbaiq
vunz ndei, dauqfanj daeu haeb vunz,
caen mbouj miz liengzsim!

(caengz sat)